

四庫全書

子部

欽定四庫全書

子部

羣書考索後集卷三十一

三十一

詳校官中書臣竇汝翼

主事臣祁韻士覆勘

總校官知縣臣楊懋珩

校對官 中書臣徐步雲

謄錄監生臣官懋斌

欽定四庫全書

羣書考索後集卷三十

宋 章如愚 編

士門

宗學

范曄有言自帝室王公之胄皆生長脂腴能勵行飭身者益寡所以立之學者豈特使為章句儒鈞爵取祿者邪教之明人倫而已人倫明則重犯法重犯法

則賢才成而可以為維城之助矣

記言庶子之正於公族漢之郡國而置宗師唐貞觀王國而立學官則訓導之官也苟能謹其選則糾察防範皆得其道則天派慶源駿駿然並為君子之歸矣昔樂伯請公族大夫晉侯曰荀家惇惠

晋大夫荀檜文敏荀之族樂壓栗敢無忌鎮靖韓

使茲四人者為之夫膏粱之性難正也故使惇惠者教之文敏者導之果敢者諗之鎮靖者修之以

列國之於公族猶知擇公族大夫以訓誨之如此

况天子乎

國語

宋朝英宗治平元年六月己亥增置宗室學官詔曰
以宗枝甚衆而誘道之方未至故命近臣舉有學行
之士為之教授傳不云乎少成若天性習貫如自然
蓋子弟之學非尊屬勉勵則莫知勸若不率教其令
尊屬同以明白大宗正司教授不職大宗正司察舉
以聞宗室自率府副率以上八百餘人其奉朝請者

四百餘人而教學之官六員而已始命增置凡皇族年三十以上者百三十人置講書四員年十五以上者三百九人增置教授五員年十四以下者別置小學教授十二員並舊六員為二十七員以分教之上謂韓琦等曰凡事之行患於漸久而怠廢况為學之道猶戒中止諸宗室之幼者仍須本位尊長常加率勵庶不懈惰可召舍人論此意作詔戒勉之故有是詔○宏詞宗學記云高山大麓固豫章枯栢所宜生

也今以公族之盛其材多固宜然世遠而益繁而教
養之法未廣哲宗皇帝明詔加恩為宗子建學以成
神考之志甚盛德也臣幸得以文字載其本末惟古
帝王莫不以學為大務而其教皆自近始文王之時
無射亦保要必由兄弟以御家邦為敘至周官成均
教國子其法益詳而同姓先焉蓋古之政教遠近親
疎固有次第如此惟漢襲秦之舊厚戚里而疎公族
明章之政於時為盛然為四姓小侯建學以東觀書

考之蓋南陽宗室有不逮者至其甚則親者見嫌疎
者不錄信厚之風安得而不衰甚可嗟也惟國家聖
聖相承其教皆以親親為本勸獎宗英唯恐居後逮
神考時法益詳宗子益秀出往往折節從學問試用
可觀今益廣學校為建師儒凡諸侯官學之所建者
悉居之其教養勸課與夫簡試升黜之法皆視太學
徽宗崇寧元年十一月庚戌起居舍人鄭居中言欲
乞諸官學別以儒臣專提舉學事或選宗正寺長貳

以學事隸之詔諸官學若宗正事長貳提舉大觀二年三月戊午兩官仲琰唐突言官學無官宗子三經公試不中乞特與升補內舍有詔放罪而大宗正司執政當行故也並長編○大觀二年九月己未御筆宗

室升貢試或不中自今許入國子學初學制局議遣歸本學上以為庶士既得辟雍不可薄於宗親故有是詔同上○大觀四年八月乙酉詔宗子升補上舍係比舊日宗室應舉之人得解其赴貢士舉試係比省

試今不經殿試便分三等命官緣熙豐未有此法可
依貢士已降指揮並留俟殿試其上中等人遇唱名
取旨同上○大觀四年閏八月甲寅工部尚書李圖南

上宗子大小學敕令格式二十二冊詔付禮部頒降

同上○政和二年四月庚戌禮部言大觀三年貢士并

宗子上舍與進士同釋褐就瓊林苑賜宴今合取旨

詔宴就辟雍仍用雅樂差知舉蔡嶷押宴同上

高宗紹興十二年七月時因有宗子犯法乙卯上謂

宰執曰見宗學教官今日率宗子講書作功課庶使用心不為惡事○紹興十二年十月己亥上謂宰執曰今後宗子許於所在入學令與寒士同處仍別作齋庶盡變積習異時文行有可取也

四門學

宋文帝永嘉十五年立儒學館○永嘉十六年命何尚之立元素學何丞大立史學謝玄立文學○元嘉二十年立國學二十七年廢

後魏孝文帝遷都洛邑立四門小學

詩靈臺疏穎子容春秋釋例云太廟四門之學謂之太學

北齊隋皆有四門學開皇三十年廢

唐高祖詔四門學生百三十員

高宗龍朔二年東都四門生三百員俊士二百員西京四門生千三百人

其五百人以六品七品及侯伯子男之子為之其

八百人以庶人俊造者為之

律學

梁武帝天監四年置胄子律博士

隋律學隸大理寺

唐武德初隸國子監尋廢○貞觀六年復置

高宗顯慶三年復廢○龍朔二年復置生二十人

宋朝神宗熙寧六年於國子監置律學○熙寧七年

五月壬戌國子監言太學生員多而齋舍少先以朝

集院為律學外屋尚百餘間乞盡充學舍從之初太
學地甚隘其東為錫慶院又其東為朝集院慶歷中
始以錫慶稍益之未幾復罷後胡瑗至乃復錫慶後
堂及二廡容諸生仍以齋筵更衣位置行堂遇乾元
節賜齋筵上權以錄行堂更衣至是并朝集院賜之
以廣二學為屋百楹學者以千計長編○元豐六年四
月壬子國子司業朱服言相度入律學命官公律律
義斷案考中第一人乞許依吏部試法與注官其太

學生或精於律義斷案就律學公試中第一與比私試第二等注籍從之

長編

徽宗政和六年六月丁卯戶部尚書兼詳定一司敕令孟昌齡等奏今參照熙寧舊法修成國子監律學敕令格式一百卷乞以政和重修為名頒降從之

長編

書學

隋國子寺統國子太學四門書算學

唐武德初廢○貞觀二年復

高宗顯慶二年又廢○龍朔二年東西都復置石經說文字林為穎業

宋朝徽宗崇寧五年正月丁巳詔書畫算醫四學並罷更不修蓋書畫學於國子監僻截屋宇充每學置博士一員生員各以三十人為額同上○大觀元年正

月甲午大司成兼侍講學制局編修官薛昂言修整書畫學畢工額各三十人分為兩齋從之同上○大觀

元年正月乙未書學直學劉應漢州進士張適並為

將仕郎應書學適畫學諭同上○大觀元年三月甲辰

詔書畫學並依崇寧四年十二月已前敕令式人額

等其後來裁損指揮勿行同上○大觀四年正月庚戌

登仕郎長沙縣丞朱克明為書學諭克明言許氏說

文其間字畫形聲多與王安石字說相戾掇其尤乖

義理者凡四百餘字名曰字括乞委官刊正國子監

看詳克明字括並以字說為証頗見用心然字說與

說文不妨兩存難以刊正而克明特有此議長編○大

觀四年三月庚子詔六藝皆聖人作迺者增學舍置
師弟子而入流命官靡有區別其令醫學生併入太
醫局算學生入太史局書學生入翰林書藝局畫學
生入翰林圖畫局置學官及人吏等○重和元年十
一月丙子提舉成都府路學士翟栖筠奏王安石參
酌古今篆隸而為之說此造道之指南而窮經之要
術也然字形書畫纖悉委曲咸有不易之體世之學
者知究其義而已至於形畫則或略而不講從俗就簡

轉易偏旁傳習既殊漸失本真如期朔之類從月股
肱之類從肉勝服之類從舟丹青之類從丹靡不有
辯而今書者乃一之若此者不可勝舉故幼學之士
終年誦書徒識字之近似而不知字之正形甚可歎
也臣竊見國子監有唐人張參唐元度所撰五經文
字及九經字樣所以辨證書名頗有依據然其法本
取蔡邕石經許氏說文而蔡許之學顧有未盡如是
從日而從月昏從氐而從民謬戾者甚衆願詔儒臣

重加修定去其訛謬存其至當一以王安石字說為
正分次部類為新定五經字樣頒之庠序詔太學官
集衆修之同上○宣和六年正月己未詔置提舉措置

書藝所以杜從古徐兢米友仁並為措置官勾官生
徒五百人為額篆正文法鍾鼎小篆法李斯隸法鍾
繇蔡邕真法歐虞褚薛草法王羲之顏柳徐李逐日
會試有并經義舉人及貴游子弟又分士流雜流為
二先是王黼以唐告三道虞世南書狄仁傑告顏真

卿書顏允南母蘭陵郡太夫人張氏告及徐浩封贈
進呈上曰朕欲教習前代書法所頒告命使能者書
之不愧前代時書學已罷故特置是局

長編

算學書畫附

隋國子寺統算學

唐廢○貞觀二年詔隸國子學

高宗顯慶元年尚書左僕射于志寧奏置令習李淳
風等注釋五曹孫子算十部算經為二十卷行用顯

慶三年詔以書算學業明經事唯小道各擅專門有乖故實並令省廢○龍朔二年東西都置九章五曹周髀為額業

唐國子監領國子太學廣文四門律書算學

宋朝神宗元豐七年正月壬戌吏部乞於四門選補算學博士闕從之

徽宗崇寧三年六月壬子都省言竊以算數之學其傳久矣周官大司徒以鄉三物教萬民而賓興之三

曰六藝禮樂射御書數周之盛時所不廢也在昔我
神宗皇帝將建學焉屬元祐異議遂不及行方今紹
隆聖緒則算學之設實始先推而行之宜在今日今
將元豐算學條制重加刪潤修成勅令冠以崇寧國
子監算學敕令格式為名又言竊以書用於世先王
為之立學以教之設官以達之置使以諭之蓋一道
德謹法守以同天下之習世衰道微官失學廢人自
為學習尚非一體畫各異殆非所謂書同文之意今

四方承平未能如古蓋未有校試勸賞之法焉今欲倣先王置學設官之制考選簡拔使人人自奮有在今日所有圖畫之技朝廷所以圖繪神像與書一體今附書學為之校試約束謹修成書畫學勅令格式一部冠以崇寧國子監為名並乞賜施行

都省上崇寧國子監算學書畫學敕令格式詔頒行之只如此書自可也五年正月二十四日並罷元豐七年十二月七日初置算學博士及學諭十

八日罷筭學

始置書畫筭學

長編

○大觀三年三月壬戌禮部太常

寺言筭學以文宣王為先師充鄒荆三國公為配享及十哲為從祀自昔著名筭數之人繪畫於兩廊欲乞加賜五等之爵然後隨所封以定其所服之服

按吳時傳時為禮部員外郎方興筭學欲以黃帝為先師時言朝廷祀黃帝祝版稱聖祖著臣名春秋釋菜孔子正中祀數學乃六藝之一若以黃帝

為先師則當用大祀或中祀也遂止此皆從祀文
宣王廟或是因時議然十一月七日丁未竟以黃
帝為先師又所奏七十人但疑從祀初未加封爵
却恐十一月七日所奏合移在三月十八日以前
更須細考之吳時行狀云朝廷不能決集禮官博
士議遂易黃帝以隸首此又與詔旨實錄不合並

須細考

宣和二年七月己未又詔算學元豐中雖存有司之

請未嘗興建又所議置官不過傳授二員今張官置
吏考選而任使之大略與兩學同既失先帝本旨賜
第之後不復責以所學何取於教養可並罷官吏依
省罷法應文籍錢物令國子監拘收長編

醫學

唐太宗貞觀三年置醫學

宋朝徽宗崇寧三年六月辛酉講議司言熙寧九年
嘗置太醫局教養生員分治三學諸軍病患歲比較

等第給錢元祐裁減浮費遂行廢罷今已別置醫學
教養上醫外所有本局並合興復從之編長○崇寧四

年四月壬子禮部言太醫局大方脉局生郭稽中等
充四川醫學教授乞國子監應干醫經方書各賜一
本從之同上○政和三年閏四月辛亥尚書省言檢會

太醫令裴宗元劄子乞就太醫局復置醫學詔依所
乞外方難得醫藥在京醫學等員數甚多並令尚書
省措置契勘翰林院見今醫官至祇候七百餘員端

閑並無職事諸路駐泊員額止百餘山州僻郡不知
藥脉坐以致斃今立較試之法隨所試中高下分遣
諸路三京七人帥府六人大藩五人上州四人中州
下州三人次遠二人從之上同○政和三年閏四月戊
午和安大夫康州防禦使曹孝忠等措置醫學奏乞
詔內外執政官以上各舉諳曉醫術文士二人以姓
名聞給以照帖俾執赴本學及十人即附試上舍所
取不得過二分合格者乞依太學上舍中等推恩不

中選者並補內舍太學上舍生並申尚書禮部奏名
乞賜以醫學上舍出身上等從事郎中等登仕郎下
等將仕郎從之詔旨○政和三年六月乙卯禮部尚書

鄭居中奏應本部所注醫職醫工不許諸州軍及諸
司奏辟亦不許舉留再任從之長編○政和三年八月

丙寅翰林院奏據翰林醫官局申禮部申請未有差
遣等醫官四百餘員端閑並無職事乞將不經就試
不終場人不注授内外差遣本局勘會若不經就試

及試不終場人依上件指揮不注授內外差遣轉見
在局端閑乞除不得注授內外差遣外如承朝廷特
旨差撥亦從所屬申取尚書省指揮施行其祇醫學
醫官太醫承直局醫正以上無差遣人不就將來秋
試及試不終場並不願注授之人更乞詳酌嚴賜約
束施行詔如承朝廷特旨差撥人令翰林院知不行
詔 ○政和三年九月乙巳提舉入內醫官曹孝忠等
言醫學將來賜上舍出身之人欲乞初任自從近降

朝旨注新授在京醫職外其後並依兩學上舍出身
入赴吏部注合入差遣從之長編○政和三年十二月

庚戌提舉入內醫官曹孝忠言臣昨蒙聖恩擢領醫
學仰體興創之初欲得通經之士兼領醫術其所推
行皆崇寧大觀已頒之令兼倣兩學之制未嘗輒敢
妄有申請其或奉朝廷一時指揮者蓋欲激勸士人
使之樂從而法行未逮半載生徒已及三百四方充
貢之士繼踵而至儒者習醫於斯為盛益見陛下美

意良法垂信天下舉知鼓舞然醫學之逮今逾十年
再興再廢者正以流俗多為毀沮伏望陛下日月照
臨使好生實德普濟四海與天地無窮不勝幸甚詔
曹孝忠以御前祇應有妨故令罷司業職事即非罪
罷可與申明行下詔旨○政和三年十二月乙卯詔
諸州醫學生赴本學試並依貢士法閏四月八日所
降指揮勿行同上○政和五年正月己丑左武大夫康
州防禦使勾當龍德宮提舉入內醫官編類政和聖

濟經曹孝忠等奏乞諸州縣並置醫學隸於州縣學
提舉學事同選差本州見任官通醫術能文者一員
兼權醫學教授比倣諸州學格內文士三年所貢人
數十分中以一分五釐人數創立諸路醫學貢額分
為三年並不侵占文士貢額諸路貢士與本學內舍
同試上舍三歲共取合格人數升補上舍以上中等
一百人為額並附文士引見釋褐學生分三科兼治
五經內一經方脉科通習大小方脉風產針科通習

針灸口齒咽喉眼目瘡科通習瘡腫傷折金鏹書禁
三科學生各習七書黃帝素問難經巢氏病源補註
本草千金方王氏脉經張仲景傷寒論三部針灸經
龍木論千金翼方方脉科黃帝素問難經巢氏病源
補註本草千金方王氏脉經張仲景傷寒論針科黃
帝素問難經巢氏病源補註本草千金方黃帝三部
針灸經龍木論瘍科黃帝素問難經巢氏病源補註
本草千金方黃帝三部針灸經千金翼方出題儒經

素問難經並於本經內出運氣義於素問出臨時指
問五運六氣司天在泉太過不及平氣之紀上下加
臨治淫勝腹所掌疾病隨歲所宜如何調治或設問
病證於今運氣如何理療處方義於所習經方內出
假令病法方脉科於千金千金翼外臺聖惠方治雜
病門中出針科於三部針經千金千金翼外臺聖惠
方龍木論治雜病及口齒咽喉眼目門中出瘍科於
三部針灸經千金千金翼外臺聖惠方治瘍瘍門中

出逐路並置醫學諭一員以本學上舍出身人充並從之

長編○政和五年九月壬午祠部言諸路醫學三

年合貢共七百三十三人合該推恩共百人又契勘舊進士并諸科解額并五路刺額及國子監開封府解額共四千八百九十二人內一百三十人充武士貢額二十四人貢孝悌特起之士四千七百三十八人立為見今諸路貢額舊省額進士五百六十人諸科四十人見今貢士三年推恩額六百人醫學貢額

係比倣諸州學格內文士三年所貢人數十人中以一分五釐人數創立諸路醫學貢額並不侵占文士貢額所有推恩人額第一第二年各三十人第三年四十人並不在文武士推恩額內詔令尚書省別行措置尚書省請諸路貢額以昨來撥充貢額內椿留一分人數充共九十五人推恩額十人詔推恩以上五人為額編長○宣和二年七月己未詔先帝董正治官太醫局丞教授立學生員額成憲具在今醫局之

外復建醫學旣違元豐舊制舍選之法本示教養今
又醫學生賜舍之後盡官州縣不復責以醫術平昔
考選遂成虛文在京醫學三舍生舊係內外學籍願
入學者止內舍並特令於見醫學合額上降一舍外
學許通理醫學校定入學令禮部國子監限五日條
具聞奏官吏依省罷法合當除者別與差遣文籍田
產應干錢物並併歸國子監同上

儒學

自太祖建隆三年始開國子監聚徒講學當是時也
斯民新脫干戈文風未大興起學者尚寡天下已平
儒者往往依山林即聞人以講授大率多至數十百
人嵩陽嶽麓睢陽白鹿四書院為尤

太宗皇帝間又驛送九經俾生徒肄業明道景祐之
間文采浸盛胡文定石守道孫明復諸公皆以師道
為學者宗而文定在湖其弟子去來常數百人各以
經傳授隱然為東南之洙泗慶歷間天子開天章閣

與大臣議天下事慨然詔州縣皆立學於是京師廣
襲慶以為太學而有司請用安定湖學之法盛矣哉
皇家養士之宏規也

太宗興國二年三月庚寅知江州周述言廬山白鹿
洞學徒常數千百人乞賜九經使之肄習詔國子監
給本仍傳送之長編

真宗咸平四年三月辛卯以國子監經籍賜潭州岳
麓山書院從知州李允則之請也長編

仁宗寶元元年四月丁亥賜河南府嵩陽書院田十

頃同上新修大黨書院名曰嵩陽書院○胡安定在

湖州置治道齋學者有欲明治道者講之於中如治

兵治民水利算數之類嘗言劉彝善治水利後累為

政皆興水利有功程氏遺書○先生尤患隋唐以來仕進

尚文詞而遺經業苟趨祿利及為蘇湖二州教授嚴

條約以身先之雖大暑必公服終日以見諸生嚴師

弟子之禮解經互有要義猥懲為諸生言其所以治

已而後治乎人者學徒千餘日月刮廁為文章皆傳
經義必以理勝信其師說敦尚行實後為太學四方
歸之庠舍不能容旁拓步軍居以廣之五經異論弟
子記之自為胡氏口義侍邇英講不以諱忌為避

蔡端明撰墓誌○曾孫滌記云侍講讀乾元亨利
貞不避諱上與左右皆失色侍講徐曰臨文不諱
上意遂解

安定先生在湖學時福州劉彝執中往從之學者數

百人彝為高弟凡紀綱於學者彝之力為多熙寧二年召對上問從學何人對曰臣少從學於安定先生胡瑗上曰其人文章與王安石孰優彝曰胡瑗以道德仁義教東南諸生時王安石方在場屋修進士業臣聞聖人之道有用有體有文君臣父子仁義禮樂歷世不可變者其體也詩書史傳子集垂法後世者其文也舉而措之天下能潤澤其民歸於皇極者其用也國家累朝取士不以體用為本而尚其聲律浮

華之詞是以風俗偷薄臣師瑗當寶元明道之間尤
病其失遂明體用之學以授諸生夙夜勤瘁二十餘
年專切學校始自蘇湖終於太學出其門者無慮二
千餘人故今學者明夫聖人體用以為政教之本皆
臣師之功也上曰其門人今在朝為誰對曰若錢藻
之淵篤孫覺之純明范純仁之直溫錢公輔之簡諒
皆陛下之所知也其在外明體適用教於民者迨數
十輩其餘政事文學粗出於人者不可勝數此天下

四方之所共知而歎美之不足者也上悅

李鷹書

○安

定先生皇祐至和間為國子直講朝廷命主太學生

千餘人先生日講易予列諸生執經座下先生每講

罷或引當時之事以明之至小畜以謂畜止也臣止

君也已乃言及中書令趙公相藝祖日上欲擇一任

諫諍臣中令具名以聞上却之弗用異日又問可任

者中令復上前劄上亦却之如此者二仍碎其奏擲

於地中令輒懷以歸他日復問中令乃補所碎劄子

至於上上乃大悟卒用其人

塵史

○胡先生瑗判國子

監其教育諸生皆有法先生每語諸生食飽未可據

案或久坐皆於血氣有傷當習射投壺游息焉是亦

食不語寢不言之遺意也程伊川曰凡從安定先生

學者其醇厚和易之氣望之可知也國子監舊有先

生祠紹聖初林自為博士聞於朝徹去

聞見錄

○安定

先生自慶歷中教學於蘇湖間二十餘年東脩弟子

前後以數千計是時方尚詞賦獨湖學以經義及時

務學中故有經義齋治事齋經義齋者擇疏通有器
局者居之治事齋者人各治一事又兼一事如邊防
水利之類故天下謂湖學多秀彥其出而筮仕往往
取高第及為政多適於世用若老於更事者由講習
有素也歐陽公詩曰吳興先生富道德詵詵弟子皆
賢才王荊公詩曰先收先生作梁柱以次收拾桷與
榱皇祐末召先生為國子監講書專管勾太學數年
進天章閣侍講猶兼學正其初人未甚信服乃使其

徒之已仕者盛晦之僑顧子敦臨吳元長孜輩分治職事又令孫莘老覺說孟子中都士人稍稍從之一日升堂講易音韻高朗指意明白衆方大服然在列者皆不喜謗議蜂起先生偃然不顧也強力不倦以卒有立迄今二十餘年猶用其規模不廢先生在學時每公私試罷掌儀率諸生會於首善掌合雅樂歌詩乙夜乃散諸齋亦自歌詩奏琴瑟之聲徹於外呂氏記

○徐積字仲車號節孝先生從安定學不復仕

進其學以至誠為本初見安定頭容稍偏安定厲色
曰頭容直積因思不獨頭容直心亦要直也自此不

敢有邪心

皇鑑
箋要

總論

言理學者主張程言數學者主康節而言經學則太
山之明復徂徠之守道而安定先生則其待學者也
宋初士以浮靡相高以雕刻相尚體用之學懵然未
之知也公也以身先之其文詩書禮樂其言仁義道

德望其容肅如也聽其言粹如也經義治事各名其
齋文藝節義隨類而處雅歌投壺以紓其情公服終
日以肅其躬學者明體用以為政教之本先生之力
居多焉是故庠舍不足旁拓步營人曰此儒學之盛
也吾獨曰從游之多者未足以為盛而從遊之皆賢
者始足以為盛吳興先生富道德詵詵子弟皆賢材
歐陽之詩以其賢而稱之也始於蘇湖終於太學人
曰此儒學之顯也吾獨曰學之獲用者未足以為顯

而學之有用者始足以為顯先收先生作梁柱以次收拾桷與棗荆公之詩以其有用而稱之也當是時出其門者淵篤純明溫直簡諒色色有之而治邊防者有人興水利者有人政事文學不可悉數安定之功大矣或曰科舉之外有義理之學義理之外有物理之學物理之外有性命之學安定之學猶未離乎科舉者噫有所學必有所用學而無用與不學等耳使人人盡棄科舉而談虛空則國誰與理民誰與治

耶又况安定之學亦未始以科舉累其心者徐節孝
非學於安定乎不樂仕進以誠為本誰實教之伊川
非學於安定乎不樂仕進以誠敬為學誰實肇之節
孝因頭容而不敢有非心安定之教非專以科舉也
伊川嘗曰凡從安定學者其醇厚和易之氣可知伊
川亦不敢忘其本也吾從學者之妄雌黃故具言之

事並見前
杜駒文

蕃學

漢明帝別立校舍自期門羽林之士悉令通孝經章
句匈奴亦遣子弟入學

唐太宗天下初定增築學舍四夷若高麗百濟新羅
高昌吐蕃相繼遣子弟入學並三場指南

宋朝太宗興國元年十二月己未是歲高麗國人金
行成始入學於國子監

神宗熙寧五年詔陝西置蕃學○熙寧七年二月庚
寅詔國子監許賣九經子史諸書與高麗國使人並長

編

○元豐七年正月壬戌詔高麗王子僧統從其徒

三十人來遊學非入貢也其令禮部別定儕勞之儀

徽宗大觀二年二月一日黔南興學御筆

黔南新造之邦人始從化雖未知學然溯其鄙心
非學無以善之委轉運判官李仲將以漸興學舉
其孝悌忠和使之勸問大詔

政和五年十一月甲申翰林學士王黼等言體問得
高麗所遣學生金瑞等五人在本國日係習詩賦今

來若許入學即願習經義及稱國王已具表請遣子弟入學見候朝廷指揮御筆令遣入學又令太學闢俊選造士二齋以處金瑞等編長○政和五年十二月

丁巳詔高麗學生每經差通經人三員充博士全編○

政和七年三月庚寅御崇政殿高麗學士權適等上舍及第釋褐以適為承事郎趙奭金瑞並文林郎歐惟氏從事郎令隨進奉使李資諒歸本國太學俊選造士齋職事人並免省試長編

孝宗淳熙八年輔臣進呈湖南安撫轉運司申郴州
宜陽縣杜陽軍臨武縣雖與溪峒接境實國家省民
欲重恢鄉校招誘溪峒子弟入學訓導上曰開設學
校使強暴子弟知有禮義庶幾移風易俗詔從之

羣書考索後集卷三十

欽定四庫全書

羣書考索後集卷三十一

宋 章如愚 編

士門

天子學

陳禮書曰四代之學○虞則上庠下庠

王制曰有虞氏養國老於上庠養庶老於下庠

夏則東序西序

王制曰夏后氏養國老於東序養庶老於西序

商則右學左學

王制曰商人養國老於右學養庶老於左學

周則東膠虞庠

東膠即東序也虞庠即上庠也

又有辟雍成均瞽宗之名

瞽宗即右學也或曰辟雍一曰成均○王制曰周人養國老於東膠養庶老於虞庠虞庠在國之西

郊詩曰鎬京辟雍

王世子曰禮在瞽宗

則上庠東序右學東膠大學也故國老於之養焉下庠西序左學虞庠小學也故庶老於之養焉祭義曰天子設四學

鄭註謂四郊虞庠之學非也

蓋周之制也辟雍即成均也以其形圜如璧則曰辟雍以其成其虧均其過不及則曰成均以習射事則

曰序以糾德行則曰膠以樂祖在焉則曰瞽宗以居右焉則曰右學蓋周之學成均居中其左東序其右瞽宗此大學也虞庠在國之西郊則小學也文王世子曰天子視學命有司行事祭先師先聖焉卒事遂適東序設三老五更之席祭義曰食三老五更於太學所以教諸侯之弟祀先賢於西學所以教諸侯之德夫天子視學即成均也命有司行事祭先師先聖焉即祀先賢於西學也祀先賢於西學則祭於瞽宗

也有司卒事適東序設三老五更之席即養國老於東膠也養國老於東膠即祀三老五更於太學也然則商之右學在周謂之西學亦謂之瞽宗夏之東序在周謂之東膠亦謂之太學蓋夏學上東而下西商學上右而下左周之所存特其上者爾則右學東序蓋與成均並建於一丘之上而已由是觀之成均領學政

董仲舒以成均為五帝之學豈非周之辟雍用成

均之舊法以為學政故辟雍亦名成均歟

右學祀樂祖東序養老更右學東序不特存其制而已又因其所上之方而位之也○大戴賈誼有帝入

五學之說

陸氏禮象曰天子設四學蓋天子立四學并其中學而五直於一處並建周人辟雍則辟雍居其中其南為成均其北為上庠其東為東序其西為瞽

宗

鄭康成謂周有四郊之虞庠王肅謂辟雍即明堂耳皆不可考也

周禮禮記掌學之官其名不同

周禮師氏掌三德以教國子禮記文王世子曰大司成論說在東序又曰父師司成鄭註以為大司成即司徒之屬師氏也周禮保氏掌養國子以道而禮記闕其官周禮大司樂掌成均之法而樂師掌國學之政禮記王制曰樂正崇四術立四教順先王詩書禮

樂以造士將出學小樂正簡不帥教者以告於大樂
正大樂正以告於王鄭註曰小樂正即樂師也而謂
大樂正為樂官之長意者即周禮大司樂歟自大胥
而下小胥大師籥師其名皆同周禮大胥掌學士之
版小胥掌學士之政令禮記王制將出學小胥大胥
小樂正簡其不帥教者以告於大樂正周禮大師教
六詩而文王世子曰春誦夏弦太師詔之周禮籥師
掌教舞羽吹籥文王世子曰籥師學戈周禮有諸子

之官燕義曰古者周天子之官有庶子之官鄭曰即諸子也

諸侯學

天子曰辟雍諸侯曰泮宮王制曰天子命之教然後為學小學在公宮之左大學在郊明堂位曰采廩有虞氏之庠也序夏后氏之序也瞽宗商學也類宮周學也然則魯亦用四代之學歟諸侯類宮與魯同制但無瞽宗與序亦有小學也陳禮書曰類宮之制半

於辟雍而水蓋缺於北方也諸侯樂懸缺其南而泮
水缺其北者缺南而存北所以便其觀也缺北而存
南所以便人之觀也泮水太學也大學在郊故記曰
魯人將有事於上帝必先有事於泮宮焉然則序與
瞽宗蓋亦設在類宮之左右而米廩在公宮之小學
歟

鄉學

孟子曰庠者養也校者教也序者射也夏曰校商曰

序周曰庠學則三代共之皆所以明人倫也陳禮書
曰孟子因論井地而及於此則校庠序者鄉學也鄉
飲酒主人迎賓於庠門之外鄉簡不帥耆老皆朝於
庠則庠鄉學名也周官州長春秋以禮會民而射於
州序黨正以禮屬民而飲酒於序則序亦鄉學名也
鄭人之所欲毀者謂之鄉校則校亦鄉學名也然鄉
曰庠記言黨有庠州曰序記言遂有序何也古之致
仕者教子弟於閭塾出書大傳則記以為家有塾云者非

家塾也合二十五家而教之於閭塾謂之家有塾可也則合二十五黨而教之鄉庠謂之黨有庠可也周禮遂官各降鄉官一等則遂之學亦降鄉一等矣降鄉一等而謂之州長其爵與遂大夫同則遂之學其名與州序同可也

漢食貨志言里胥坐右塾則里亦有塾蓋閭在遂則為里又言里有序又言鄉有庠其名不同

大小内外之辨

陳禮書據祭義之說 周設四代之學以為辟雍居中一名成均東序在左一名東膠又名太學右學在右一名瞽宗一名西學天子大學在內者三小學在外者一虞庠是也

虞庠在國之西郊一名上庠米廩

陸氏禮象據大戴禮賈誼之說以東學為東序南學為成均西學為瞽宗北學為上庠太學為辟雍此五學在內者皆大學也小學在外東膠虞庠是也二者

皆有所據未知其孰當然而天子之學小學居外大學居內諸侯之學大學在外小學在內蓋諸侯選士由內以升於外然後達於京故也天子選士由外以升於內然後達於朝故也

天子視學

禮曰天子視學四養老也簡不帥教也出征受成也以訊馘告也

其養老也

天子之於老也其所養也三國老也庶老也死政者
之老也歲養之也三仲春也季春也仲秋也周禮羅
氏羅春鳥獻鳩以養國老在仲春月令養衰老授几
杖在仲秋文王世子曰凡大合樂必遂養老鄭氏云
大合樂謂春入學釋菜合舞秋頌學合聲於是時也
天子則視學焉遂養老於仲春仲秋者也月
令季春之末擇吉日大合樂天子乃率三公九卿諸
侯大夫親往視之大合樂亦必養老此又養老於季

春者也夫貴胄謂之國子則貴而老者謂之國老賤者謂之庶人則賤而老者謂之庶老國子與庶人之俊者同其學所以一道德國老與庶老異其學所以別分義故有虞氏養國老於上庠養庶老於下庠夏后氏養國老於東序養庶老於西序商人養國老於右學養庶老於左學周人養國老於東膠養庶老於虞庠而又有死政者之老焉故羅氏獻鳩以養之者國老也司徒以保息養之者庶老也司門以其財養

之者死政者之老也若夫外饗酒正槁人所謂耆老者總三者而言之也鄭氏謂三老五更各一人皆年老更事致仕者也名三五者取象三辰五星天所以照明天下者皇氏謂人君養老有四種一是養三老五更二是子孫為國難而死者父祖三是養致仕之老四是引戶校年庶人之老熊氏云天子視學養老一歲有七鄭氏云凡飲養陽氣凡食養陰氣陽用春夏陰用秋冬是四時養老凡四也文王世子凡大

合樂心遂養老大合樂謂春入學舍菜合舞秋頌學
合聲又季春大合樂天子視學亦養老是七也然則
古者建國必立三卿鄉飲酒必立三賓而養老必立
三老故禮曰三公在朝三老在學三公非一人則三
老五更非各一人矣漢志以德行年高者一人為老
次一人為更故永平中拜桓榮為五更建初中拜伏
恭為三老而鄭氏以此為三代之制誤矣先王父事
三老兄事五更則三老五更乃羣老之尤者而致仕

之老固在其間皇氏離而二之亦誤矣月令無冬夏
養老之文周禮禮記特言春養秋食而已熊氏謂養
老歲有七亦誤矣又禮記言天子視學遂適東序養
老則視學養老皆同日也鄭氏謂用其明日亦誤矣
養老之禮外饔掌割烹酒正共酒槁人共食羅氏共
鳩方其養也必先釋奠於先老遂設三老五更羣老
之席位適饌省醴養老之珍具遂發咏焉登歌清廟
下管象武天子袒而割牲執醬而饋執爵而酳冕而

總干則乞言憲行之養著而孝弟之化行矣有司告以樂闋王乃命公侯伯子男及羣吏曰反養老幼於東序而終之以仁此所謂一舉事而衆皆知其德之備也禮言凡養老有虞氏以燕禮而服深衣夏后氏以饗禮而服燕衣商人以食禮而服縞衣周人脩而兼用之而服玄衣蓋虞氏以燕則以恩勝禮夏后氏以饗則以禮勝恩商人以食則趣恩禮之中而周則文備故修而兼用之周官外饗言饗者老此周人以

饗禮養老也行葦言飲射而繼之以祈黃者此周人
以燕禮養老也祭義曰食三老五更於太學此周人
以食禮養老也

漢明帝養老之禮天子親袒割牲執醬執醑祝哽在
前祝噎在後其禮似矣然所養特三老五更二人而
已羣老不與焉非古禮之意也

三老五更皆三代所尊也

三者道成於三謂天地人也老者舊也壽也詩云

方叔元老書稱無遺耆老黃耆之言則罔所僭
五者訓於五品更者更也五戌長子更相代言
其能以善道改更已也故三老五更皆取有道
夫妻男女完具者為之鄭玄曰老更互言之耳
皆老人更知三德五事者也蔡邕曰更當為叟
字之誤也

天子父事三老兄事五更親袒割牲執醬而饋執
爵而酳三公設几九卿正履祝哽在前祝噎在後

使者安車輶輪送迎至家天子獨拜於屏其明日
三老詣闕謝以其禮遇太尊故也

後漢明帝以李躬為三老桓榮為五更

桓榮皆以二千石祿養終其身

安帝以魯丕李充為三老

靈帝又以袁逢為三老賜以玉杖

玉杖長九尺端以鳩為飾鳩者不咽之鳥欲老

人之不咽也

魏高貴鄉公即位幸太學命王祥為三老祥字休徵鄭小同為五更祥南面几杖以師道自居天子北面乞言祥陳明王聖帝君臣政化之要以訓之聞者莫不砥礪

後魏孝文養老於明堂以尉元為三老荀仁游明元字

根為五更明根字遠志帝再拜三老肅拜

鄭衆云但俯下手今時揖拜是也

給三老上公之祿五更九卿之祿

後周武帝保定三年詔以太傅燕國公于謹為三老賜延年杖帝幸太學以食之三老入門皇帝迎拜門屏之間三老答拜有司設三老席於中楹南向太師晉國公護升階設几於席三老升席南面憑几而坐大司寇楚國公寧升階正舄皇帝升立於斧扆之前西面有司進饌皇帝跪設醬豆親自袒割三老食訖皇帝又親跪授爵以醑有司撤訖皇帝北面立訪道三老乃起立於席後皇帝曰猥

當天下重任自惟不才不知政治之要公其誨之
三老答曰木從繩則正后從諫則聖自古明王聖
主皆虛心納諫以知得失天下乃安惟陛下念之
云云三老言畢皇帝再拜受之三老答拜禮成而
出唐制仲秋吉辰親養三老五更於太學通典
其簡不帥教出征受成以訊馘告也

王制曰天子出征受成於學出征執有罪反釋奠於
學以訊馘告將出學小胥大胥小樂正簡不帥教者

以告於大樂正大樂正以告於王王命三公九卿大夫元士皆入學不變王親視學然則養老有常時

謂仲春季春秋仲秋

事見前

而簡不帥教者受成獻馘則無常時雖無常時其入學也亦必養老焉禮書○古者諸侯視學之禮蓋有同於天子泮水所言是也

釋奠

周制王制出征執有罪反釋奠於學以訊馘告

釋菜奠幣禮先師也

禮記月令仲春曰是月也命樂正習舞為將上丁釋

奠於國學

釋謂置也謂置牲幣之奠於文宣王

天子及公卿諸侯大夫親往視之觀其禮也

命有司上戊

釋奠於太公廟亦用牲幣之奠

○又月令仲秋曰是月也命

樂正習吹○春夏尚舞秋冬尚吹習之為將釋奠○

上丁釋奠於國子天子乃率公卿諸侯大夫親往視

之

禮儀同仲春

是月也命有司上戊釋奠於太公廟

禮儀同仲春

春

文王世子凡學春官釋奠於先師秋冬亦如之

不言夏夏從春可知也釋奠者設薦饌酌奠而已

無迎尸以下之事

凡始立學者必釋奠於先聖先師及行事必以幣凡
釋奠者必有合也有國故則否

合者當與鄰國合也

凡大合樂必遂養老

大合樂為春入學舍菜合舞秋頌學合聲於是時也天子則視學焉遂養老者謂用其明日也

始立學者既釁器用幣然後釋菜

菜芹藻之屬

不舞不授器

釋菜禮經也釋奠則舞舞則授器司馬之器司兵

司戈司盾祭祀授舞者兵也

乃退賓於東序一獻無介語可也

釋菜於虞庠則賓賓於東序

天子視學大昕鼓徵乃命有司行事興秩節祭先師
先聖焉有司卒事反命始之養也適東序釋奠於先
老

周禮凡有道有德者使教焉死則以為樂祖祭於瞽
宗大祝大會同造於廟宜於社過大山川則用事焉
反行舍奠

曾子問曰凡告必用制幣反亦如之

甸祝舍奠於祖廟禡亦如之

賈公彥曰非時而祭即曰奠以其不立尸奠之言
停停饌具而已

儀禮賓朝服釋幣於禰又釋幣於行遂受命上介釋
幣亦如之釋幣於門乃至於禰筵几於室薦脯醢觴

酒陳

主人酌進奠一獻言陳者將復有次也先薦後酌
祭禮也行釋幣反釋奠略出謹入也

席於阼薦脯醢三獻

並儀禮

周武王入殷未及下車而封先代之後益追思其德也孔子以大聖而終於陪臣未有封爵見晉志

漢元帝孔霸以帝師賜爵號褒成君奉孔子後

後漢明帝永平二年三月帝始率羣臣射養三老五更於辟雍行大射之禮郡國縣道行鄉飲酒於學校皆祠先聖先師周公孔子漢志

魏文帝黃初二年正月詔以議郎孔羨為宗聖侯邑百戶奉孔子祀令魯郡脩舊廟置百戶吏卒以守衛之

魏齊王正始三年二月五年正月七年十二月並使太常釋奠以太牢祠孔子於辟雍以顏回配

晉志

晉范堅書問馮懷曰漢氏以來釋奠先師唯仲尼不及公旦何也馮答曰若如來談亦當憲章堯舜文武豈惟周旦乎○摯虞釋奠頌曰如彼泉流不盈不運講業既終禮師釋奠升觴折俎上下惟善邕邕其來肅肅其見

晉武帝太始三年十一月改宗聖侯孔震為奉聖亭

侯又詔太學及魯國四時備三牲以祀孔子

晉志

武帝太始七年

惠帝元康三年二釋奠皆於太學○太始六年元康五年二行鄉事皆於辟雍

惠帝之為太子及愍懷太子講經竟並親釋奠於太

學

通典

東晉元帝大興二年皇太子並親釋奠以太牢祠孔子以顏回配

晉志

明帝太寧三年詔給奉聖亭侯孔亭四時祠孔子祭宜如太始故事

成帝咸康元年○穆帝升平元年三月

孝武寧康三年七月並釋奠如故事穆帝孝武並權以中堂為太學並晉志

宋文帝元嘉二十二年太子釋奠採晉故事祭畢親臨學宴會太子以上悉在

南齊武帝永明三年有司奏宋元嘉舊事學生到先

釋奠先聖先師禮又有釋菜未詳今當行何禮用何樂及禮器時從喻希議用元嘉故事設軒懸之樂六佾之舞牲牢器用悉依上公

梁武帝天監八年皇太子釋奠周捨議既惟大禮請依東宮元會太子著絳紗裸音博衣領也樂用軒懸合升殿坐者皆服朱衣帝從之○又有司以為禮云凡為人子者升降不由阼階吏部郎徐勉議鄭玄云由命士以上父子異宮宮室既異無不由阼階之禮請釋

奠及宴會太子升堂並宜由東階若舉駕幸學自然
中階其會賓客依舊西階○大同七年皇太子表其
子寧國臨城公入學時議者以與太子有齒胄之議
疑之僕射臣纘等以為參點回路並事宣父鄒魯稱
盛洙泗無譏師道既光得以資敬無虧亞二制可並通典

後魏明帝正光二年三月庚午幸國子學祠孔子以
顏回配南史

北齊將講於天子講畢以一太牢釋奠孔宣父配以
顏回列軒懸樂六佾舞皇太子每通一經及新立學
必釋奠禮先聖先師每歲春秋二仲常行其禮每月
朔制祭酒領博士以下及國子諸學生以上太學四
門博士升堂助教以下太學諸生階下拜孔聖揖顏
回日出行事其郡學則於坊內立孔顏廟博士以下
亦每月朝

隋制國子寺每歲四仲月上丁釋奠於先聖先師年

別一行鄉飲酒禮

唐志仲春仲秋釋奠於文宣王武成王皆以上丁國學以祭酒司業博士為一獻

唐六典曰仲春上丁釋奠於孔宣父以顏回配焉其七十二弟子及先儒並從祀仲秋之月亦如之仲春上戊釋奠於齊太公以留侯張良配焉仲秋之月亦如之凡州縣皆置孔宣父廟以顏回配仲春上丁州縣官行釋奠之禮仲秋上丁亦如之通並

典

唐高祖武德二年始詔國子學立周公孔子廟○武德七年高祖釋奠焉以周公為先聖孔子配武德九年封孔子之後為褒聖侯並唐志

太宗貞觀三年左僕射房玄齡博士朱子奢建言周公仲尼皆聖人然釋奠於學以夫子也大業以前皆孔子為先聖顏回為先師乃罷周公升孔子為先聖以顏回配○貞觀四年諸州縣學皆作孔子廟○貞

觀十一年詔尊孔子為宣父作廟於兗州給戶二十
以奉之並唐志○貞觀十四年太宗親釋奠於國子學

詔祭酒孔穎達講孝經○貞觀二十年二月詔皇太

子於國學釋奠於先聖先師皇太子為初獻國子祭

酒張復肩為亞獻光州刺史攝司業趙弘智為終獻

既而就講弘智演孝經忠臣孝子之義右庶子許敬

宗上四言詩以美其事○貞觀二十一年中書侍郎

許敬宗奏秦漢釋奠無文可檢至於魏氏則使太常

行事自晉宋以降學官主祭

並唐會要

高宗永徽中復以周公為先聖孔子為先師顏回左丘明以降皆從祀○顯慶二年太尉長孫無忌等言禮釋奠於其先師若禮有高堂生樂有制氏詩有毛公書有伏生又禮始立學釋奠於先聖鄭氏註若周公孔子也故貞觀以孔子為先聖衆儒為先師且周公作禮樂當同王者之祀乃以周公配武王而孔子為先聖總章元年二月二十九日皇太子弘釋奠於

學贈顏回為太子少師曾參少保○咸亨元年詔州

縣皆營孔子廟

並唐志

○永隆二年二月皇太子親行

釋奠之禮○開耀元年二月十九日皇太子釋奠於

國學

並唐會要

武后天授元年封周公為褒德王孔子為隆道公

中宗神龍元年以鄒魯百戶為隆道公采邑以奉歲

祀子孫世襲褒聖侯

並唐志

○寶龍二年七月皇太子

親釋奠於國學

會要

睿宗太極元年以兗州隆道公近祠戶三十供灑掃
加贈顏回太子太師曾參太子太保皆配享

唐志

○太

極元年二月二十八日皇太子親釋奠開講筵國子
司業褚無量執經

唐會要

玄宗開元七年先聖廟十哲皆坐圖七十子及二十
二賢於壁從李元瓘請也

二十二賢左丘明卜子夏公羊高穀梁赤伏勝高
堂生戴聖毛萇孔安國劉向鄭衆賈逵杜子春馬

融盧植鄭康成服虔何休王肅王弼杜預范甯也

貞觀中詔配享尼父廟

唐志

開元七年十一月以貢舉人將謁先師質問疑義敕

曰皇太子及諸子雖年未志學而道在尊師宜行齒

胄禮○開元七年皇太子入國學行齒胄禮謁先聖

皇太子初獻其亞獻終獻並以胄子充常侍褚無量開

講孝經及禮記文王世子篇○開元十一年九月十

一日敕春秋二時釋奠諸州依舊用牲牢屬縣酒脯

而已○開元十九年正月三十日敕春秋二時釋奠
天下諸州縣並停牲牢唯用酒脯自今以後永為常

式並唐會要○開元二十七年詔夫子既稱先聖可謚曰

文宣王遣三公持節冊命以其嗣為文宣公任州長
史代代勿絕先時孔廟以周公坐南面而夫子坐西
牖下貞觀中廢周公祭而夫子位未改至是二京國
子監天下州縣夫子始皆南面以顏回配於是二京
之祭牲太牢樂宮懸舞六佾矣一縣之牲以少牢而

無樂志 ○ 開元二十八年二月五日敕文宣王廟春

唐

秋釋奠宜令三公行禮著之常式二十日國子祭酒
劉瑗奏准故事釋奠之日羣官道俗皆合赴監觀禮
請依故事著之常式制可之其儀具開元禮通典

德宗建中元年二月國子司業歸崇敬奏上丁釋奠

其日舊例合集朝官講論五經文義自天曆五年以

前常行不絕其年八月已後權停講論今既日逼恐

須復舊依奏 ○ 貞元二年二月釋奠自宰臣已下畢

集於國學學官升講座陳五經大義及先聖之道○
貞元九年九月太常奏以十一月貢舉人謁先師合
與親享太廟日同准六典上丁釋奠若與太祠同日
即用仲丁其謁先師請別擇日從之○貞元十五年
四月歸崇敬為膳部郎中奏時議每年春秋二時釋
奠祝版御署訖北面而揖臣以為其禮太重按大戴
禮師尚父授周武王丹書武王東面受之請參酌輕
重庶得其宜並唐會要

憲宗元和九年禮部奏貢舉人謁先師自是不復行矣
唐志

宋朝太祖增修學舍親撰先聖及亞聖贊其十哲分命宰臣兩制已下撰贊○建隆二年十一月禮部貢院移牒禮院云竊以千載昌朝聿興文教四方貢士皆集皇都祇謁先師素聞舊典爰及近代又廢其儀太學之盛禮未陳四國之羣儒安仰請檢詳儀制禮院准禮閣新儀云舊儀無貢舉人謁先師之文開元

二十六年詔諸路貢舉人見訖就國子監謁先師官
為開講質問疑議所司設食自後遂為常禮貢院遂
議復行謁先師之祭自後每歲十一月必行此祭而
貢舉人集焉無舉人即不祭

真宗幸西京謁先聖○咸平二年帝幸國子監謁先
師並會要

仁宗景祐元年詔釋奠用登歌之樂會要

神宗元豐三年二月辛卯京兆府學教授蔣夔言春

秋釋奠以孔子為先聖顏回為先師先聖之樽在西
先師之樽在東肆祭器實牲體盥手濯爵奠幣讀祝
拜讀升降進退之節與孔子無少異而九人之像坐
於兩旁樽酒豆肉不及且孔子師也顏子雖大賢與
九人者徒也乞下臣議於禮官薦享祝獻顏子降於
孔子九人降於顏子以正開元之失禮詔禮院詳定
禮官言唐顯慶二年長孫無忌議案永徽之令改周
公為先聖孔子為先師漢魏以來取舍各異顏回夫

子互作先師宣父周公迭為先聖今看詳孔子顏子
稱號歷代各有據依難輒更改并配享正享禮意及儀物祝
獻亦難降殺所乞進九人亦在祀典蓋州縣舊釋奠
儀未有十哲從祀之文檢熙寧祀儀十哲皆為從祀
各設籩二豆二俎簠簋爵各一命官分獻一奠而止
乞自今三京及諸州文宣王廟十哲像春秋釋奠並
準熙寧祀儀從之長編

哲宗元祐六年十月庚午朝獻景靈宮退幸國子監

詣至聖文宣王殿行釋奠禮一獻再拜幸太學御敦化堂召宰臣執政官親王從臣賜坐禮部太常寺本監官承務郎以下三學生坐於東西廡侍講吳安詩執經國子祭酒豐稷講尚書無逸終篇復命宰臣以下二三學生坐賜茶國子監進書籍七十二部軸上命留論語孟子各一部遂幸昭烈武成王廟酌獻肅揖禮畢還內是日賜豐稷三品服本監官學官等賜帛有差先是范百祿轉對請視學故有是舉長編

徽宗崇寧三年六月癸卯詔荆國公王安石配享孔

子廟庭編長○崇寧四年三月丁未禮部言常州進士

孫天興言伏覩諸路州縣學校春秋上丁釋奠自先

聖文宣王至於十哲其餘古今宗公巨儒係享祀者計八

十餘員並未預祭欲乞應諸學校每遇釋奠日就先

聖殿西廊隨例祭祀從之編長○崇寧四年五月己亥

臣僚言國學至州縣學春秋釋奠皆習儀於先聖殿

庭本欲致恭盡禮而反近於瀆望自今習儀前期就

學之講堂從之長○崇寧四年七月丁未禮部太常

寺言邢州教授曾弼言孔子廟春秋釋奠自宣聖以至十哲禮物略具其他兩廡從祀薦獻蔑如也乞放

太學制度頒其法於天下前一日守倅縣令率教官

分獻官詣學齋宿躬親點檢今乞依曾弼所言並與

國子監共修成外州軍釋奠儀注乞鏤板倣下從之

如祭器不足以他物充代長○大觀四年九月丁丑

禮部奏從祀文宣王公夏首等封爵詔公夏首封鉅

平侯等一十人並封○政和二年四月庚寅國子監
言十哲從祀贊文有犯先聖名者合改撰從之長編○

政和四年四月戊辰詔諸路州軍學生習雅樂已精
熟處春秋釋奠並許用從成都府路轉運副使周燾
奏請也長編○政和六年四月丙子新知遂寧府徐見

可奏乞春秋釋奠於學諸生並依郊廟禮例給士服

詔送制局詔旨

高宗紹興十四年三月己巳上幸太學祇謁先聖先

師止輦於大成殿門外趨登降執爵灌獻注視貌像
翼翼欲慕復覽

太祖真宗徽宗所製贊文又命有司悉取從祀諸賢
併錄以進遂升堂頒手詔示樂育詳定之意賜諸生
坐命國子司業高閎講易泰卦學宮內外舍生推恩
有差復幸養正持志二齋諸生肄業之所徘徊久之
即除閩禮部侍郎言者以為盛事請宣付史館從之
於是上親製文宣王贊曰大哉宣聖斯文在茲帝王

之式古今之師志則春秋道由忠恕賢於堯舜日月
其譽維時載雍戢此武功肅昭盛儀海宇聿崇閥奏
曰陛下頒示御製宣聖贊文形容至德無愧於古上
曰唐明皇作贊文乃斥先聖先師之名非尊儒重道
之意閔曰此尤見聖學高於前代帝王之上旣又御
製七十二子贊其序略曰朕茲幸太學延見諸生因
作文宣王贊幾政餘閒歷取顏回而下七十二人亦
為製贊僉刊石置於太學

中興紀事

奠者陳而奠之也鄭氏曰釋奠者設薦饌酌奠而已無迎尸以下事考之儀禮禮賓歸至于禰薦脯醢觴酒陳陳者所以奠之也則釋奠設薦饌酌奠而已可知也特牲饋食奠之於尸未至之前則釋奠無迎尸可知也古者釋奠或施於山川或施於廟社或施於學周官太祝大會同造於廟宜於社過大山川則用事焉反行舍奠甸祝舍奠於祖廟禰亦如之此施於山川廟社者也大司樂凡有道

者有德者使教焉死則以為樂祖祭於瞽宗文王
世子凡學春官釋奠於先師秋冬亦如之凡始立
學者必釋奠於先聖先師及行事必以幣凡釋奠
者必有合也天子視學大昕鼓徵乃命有司行事
興秩節祭先師先聖焉有司卒事反命適東序釋
奠於先老王制出征執有罪反釋奠於學以訊馘
告此施於學者也山川廟社之祭不止於釋奠學
之祭釋奠而已賈公彥曰非時而祭曰奠此為山

川廟社而言之也學之釋奠則有常時者有非時者文王世子凡學春官釋奠於先聖先師秋冬亦如之鄭氏曰不言夏夏從春可知此常時之釋奠也凡始立學天子視學出征執有罪反以訊馘告必釋奠焉此非時之釋奠也釋奠之禮有牲幣有合樂有獻酬太祝造於廟宜於社過大山川則用事反則釋奠此告祭也曾子問曰凡告必用牲幣文王世子凡始立學釋奠行事必以幣此釋奠有

牲幣之證也文王世子凡釋奠者必有合也此釋
奠有合樂之證也聘禮觴酒陳席於阼薦脯醢三
獻一人舉爵獻從者行酬乃出此釋奠有獻酬之
證也然山川廟社之釋奠皆有牲幣學之釋奠非
始立學則不必有幣也學之釋奠有合樂則山川
廟社不必有合也聘賓釋菜有三獻則天子諸侯
之於山川廟社不止三獻也凡始立學與天子視
學釋奠於先聖先師四時則釋奠先師而已文王

世子謂春釋奠於先師鄭氏釋王制亦謂釋奠禮先師其說是也然鄭氏以王制之釋奠為釋菜奠幣以文王世子之釋奠者必有合為與鄰國合孔穎達以學記之釋菜為釋奠其說誤也並禮

釋菜

周禮大胥春入學舍菜合舞

鄭司農云古者士見於君以雉為摯見於師以菜為摯菜直為蔬食菜羹之菜鄭康成云舍即釋也

始入學必舍菜禮先師也菜蘋藻之屬

占夢季冬乃舍萌於四方以贈惡夢

舍萌猶釋菜也

儀禮上婚禮若舅姑既沒則婦入三月乃奠菜
以筐祭菜蓋用席於廟奧東面右几席於北方南
面祝盥婦盥於門外歸執笄菜祝帥婦以入祝告
稱婦之姓曰某氏來婦敢奠嘉菜於皇舅某子婦
拜拔地坐奠菜於几東席上還又拜如初婦降堂

取笄菜入祝曰某氏來婦敢告於皇姑某氏奠菜
於席如初禮婦出祝闔牖戶詩采蘋曰予以采繁于
沼于沚予以用之公侯之事予以采蘩南澗之中
予以用之公侯之宮采蘋曰予以采蘋南澗之濱于
以采藻于彼行潦予以盛之維筐及筥予以湘之
維錡及釜予以奠之宗室牖下左傳苟有明信澗
溪沼沚之毛蘋蘩蕰藻之菜筐筥錡釜之器潢汙
行潦之水可薦於鬼神可羞於王公禮記月令仲

春上丁命樂正習舞釋菜文王世子始立學者既
釁器用幣然後釋菜不舞不授器乃退賓於東序
一獻無介語可也學記皮弁祭菜示敬道也喪大
記大夫士既殯而君往焉巫止於門外祝代之先君
釋菜於門內

周禮大胥春入學舍菜合舞學記皮弁祭菜示敬
道也月令仲春上丁命樂正習舞釋菜文王世子
始立學者既釁器用幣然後釋菜不舞不授器乃

退儻於東序一獻無介語可也然則釋菜之禮猶
摯也婦見舅姑其摯也棗栗假脩若沒而廟見則
釋菜弟子見師其摯也束脩若禮於先師則釋菜
大胥釋菜合舞而文王世子釋菜不舞不授器者
以釋奠既舞故也士喪禮君視斂釋菜入門喪大
記大夫士既殯而君往焉釋菜於門內占夢季冬
乃舍萌於四方舍萌釋菜也則釋菜之禮豈特子
弟之見先師婦之廟見而已哉婚禮奠菜席於廟

奥東面右几席於北方南面祝盥掃盥於門外婦執笄菜祝師婦以入祝告稱婦之姓曰某氏來婦敢奠嘉菜於皇舅某子婦拜扢地坐奠菜於几東席上遠又拜如初婦降堂取笄菜入祝曰某氏來婦敢告於皇姑某氏奠菜於席如初禮記曰笄緇被纁裏加於橋蓋婦菜盛以笄笄飾以緇被纁裏加之於橋橋設於門外婦盥執笄以入坐奠於東几上然則弟子之見先師其儀蓋此類歟鄭氏謂

婚禮奠菜蓋用葷入學釋菜蘋藻之屬始立學釋
菜芹藻之屬蓋以泮宮有芹藻子事父母有革變
故有是說也菜之為摯則菜而已采蘋教成之祭
毛氏謂牲用魚芼之用蘋則詩所謂湘之者芼之
也與釋菜異矣禮書

唐太宗貞觀二十一年二月丁丑皇太子釋菜於太
學

宋朝徽宗大觀元年十一月丁巳大司成強闕等

言自今每歲貢士第一人並乞於正月公試鎖院前
擇日引見及應貢士始入辟雍以元日釋菜於先聖
從之長編○政和六年閏正月丁酉詔高麗李生來歲
元日隨貢士釋菜從提舉江南西路學事鄭滋奉請
也長編



羣書考索後集卷三十一